



Broj: 01-50-1-54-59/05
Sarajevo, 29. juna 2005.

ZAPISNIK

59. sjednice Predstavničkog doma
Parlamentarne skupštine Bosne i Hercegovine,
održane 29. juna 2005. godine

Sjednica je počela u 10,05 sati. Prisustvovalo je 40 poslanika. Opravdano su odsustvovali Abdulah Nakaš i Senija Kapetanović.

Iz Vijeća ministara prisustvovali su: predsjedavajući Adnan Terzić, ministri Ljerka Marić, Bariša Čolak, Mirsad Kebo i Dragan Doko.

Iz međunarodnih organizacija sjednicu su pratili: Jelena Despot - OHR, Kristijan Haupt – OSCE i Loredana Pascu – rumunska ambasada.

Uvodne napomene o prijedlogu dnevnog reda dao je predsjedavajući Doma Šefik Džaferović. Rekao je, pored ostalog, da su poslanici dobili dopunjeni prijedlog dnevnog reda koji je usaglašen na sjednici Proširenog kolegija, a u koji je uključeno potvrđivanje imenovanja zamjenika ministra vanjskih poslova.

Dalje je predsjedavajući rekao da su dostavljena dva prijedloga rezolucija o Srebrenici, koje su podnijeli Muhamed Moranjkić i Elmir Jahić, i iznio svoje mišljenje da smatra da bi ih trebalo uvrstiti u dnevni red i da bi Dom trebao da usvoji rezoluciju o Srebrenici, jer su se povodom 10.godišnjice ovog najvećeg genocida u Evropi od Drugog svjetskog rata oglasili i parlamenti drugih zemalja i brojne institucije, rekao je Šefik Džaferović.

Predsjedavajući je, govoreći o prijedlogu dnevnog reda, rekao da će predložiti da se kao tačka uvrsti imenovanje članova u Zajedničku komisiju oba doma radi postizanja sporazuma o identičnom tekstu Zakona o željeznicama, jer ima saznanja da će u Domu naroda ovaj zakon biti usvojen s određenim amandmanima koji nisu bili u ovom domu, a da bi se što prije usvojio konačan tekst zakona.

Elmir Jahić predložio je da se u dnevni red uvrsti rezolucija o Srebrenici, čiji je tekst podnio pred početak sjednice.

Nikola Špirić predložio je da predsjedavajući Vijeća ministara informira Dom da li je prevaziđena kriza u Vijeću ministara. Zatražio je da ovo bude prva tačka dnevnog reda.

Špirić se nije složio s prijedlogom Šefika Džaferovića da se u dnevni red uvrsti tačka o imenovanju članova Zajedničke komisije za usaglašavanje Zakona o željeznicama, jer Dom naroda još nije završio razmatranje tog zakona. Zatražio je da se poštuje Poslovnik i da se tako čuva dignitet Parlamenta.

Što se tiče rezolucija, Špirić je, pored ostalog, rekao da bi bilo mudro da se one upute na prethodno razmatranje nadležnoj komisiji, tim prije što imamo dva različita prijedloga, kako bi se usaglasio jedan jedinstven tekst, u što treba da se uključe i klubovi poslanika.

Milorad Živković predložio je da se u dnevni red, po članu 105. Poslovnika, uvrsti Prijedlog zakona o izmjenama i dopunama Izbornog zakona Bosne i Hercegovine.

U raspravi o prijedlogu dnevnog reda učestvovali su: Momčilo Novaković, Jozo Križanović (predložio da se Informacija o stanju sigurnosti i Inicijativa Kluba SDP-a pomjere na 5. i 6. mjesto dnevnog reda, da bi im se dao prioritet jer na prošloj sjednici nisu završene), Tihomir Gligorić (podržao prijedlog Nikole Špirića da predsjedavajući Vijeća ministara podnese informaciju), Beriz Belkić, Sead Avdić, Elmir Jahić, Zlatko Lagumdžija i Jelina Đurković.

Ministar vanjske trgovine i ekonomskih odnosa, kao i njegov zamjenik, zatražili su da se s dnevnog reda skine Prijedlog zakona o duhanu, jer Vijeće ministara još nije usvojilo mišljenje tog ministarstva o ovom zakonu.

Poslije rasprave predsjedavajući Doma proveo je glasanje o iznesenim prijedlozima.

Prvo je na glasanje dao prijedlog da se pomenute rezolucije prethodno upute nadležnoj komisiji.

Za Moranjkićev Prijedlog rezolucije glasalo je 17, protiv 20, suzdržao se jedan poslanik.

Za Prijedlog rezolucije Elmira Jahića glasalo je 15, protiv 20, suzdržao se jedan poslanik.

Prema tome, prijedlozi da se predložene rezolucije prethodno razmatraju u komisiji nisu usvojeni pa su rezolucije automatski uvrštene u dnevni red, u skladu s Poslovnikom.

Prijedlog Šefika Džaferovića da se u dnevni red uvrsti imenovanje članova u Zajedničku komisiju, radi usaglašavanja Zakona o željeznicama, nije dobio entitetsku većinu. Za je glasalo 19, protiv 13 (iz Federacije 18, iz RS-a jedan). Nakon usaglašavanja u Kolegiju kao komisiji, iz RS-a protiv je glasalo 10 poslanika.

Usvojen je prijedlog Nikole Špirića i Tihomira Gligorića da se u dnevni red uvrsti informacija predsjedavajućeg Vijeća ministara o stanju u Vijeću ministara. Za je glasalo 28, protiv četiri, suzdržalo se šest poslanika, iz Federacije za je glasalo 17, iz RS-a 11.

Nije usvojen prijedlog Milorada Živkovića da se u dnevni red, po članu 105. Poslovnika, uvrsti Prijedlog zakona o izmjenama i dopunama Izbornog zakona BiH. Za je glasalo osam, protiv 25, suzdržalo se šest poslanika.

Usvojen je prijedlog Joze Križanovića da se promijeni redoslijed tačaka, kako je predložio.

U vezi s prijedlogom ministra vanjske trgovine i ekonomskih odnosa, predsjedavajući Džaferović rekao je da nije moguće skinuti Prijedlog zakona o duhanu jer je to sada obavezna tačka.

Konačno, predsjedavajući je konstatirao da je za 59. sjednicu Doma usvojen sljedeći

D N E V N I R E D

1. Informacija predsjedavajućeg Vijeća ministara o stanju u Vijeću ministara, imajući u vidu zaključak Predstavničkog doma s prošle sjednice,
2. Zapisnik 58. sjednice Predstavničkog doma,
3. Potvrđivanje imenovanja zamjenika ministra vanjskih poslova BiH,
4. Poslanička pitanja i odgovori,
5. Zahtjev Vijeća ministara za razmatranje Prijedlog zakona o izmjenama Zakona o javnim nabavkama Bosne i Hercegovine, po hitnom postupku, u skladu s članom 105. Poslovnika,
6. Informacija o stanju sigurnosti Bosne i Hercegovine u 2004. godini,
7. Inicijativa Kluba poslanika SDP-a za osnivanje Odbora/Komisije za usvajanje teksta državne himne Bosne i Hercegovine,
8. Prijedlog zakona o duhanu (prvo čitanje) – predlagači: poslanici Zlatko Lagumdžija, Jozo Križanović i Selim Bešliagić,
9. Prijedlog zakona o praznicima Bosne i Hercegovine, s Izvještajem Ustavno-pravne komisije – predlagači: poslanici Zlatko Lagumdžija, Jozo Križanović i Selim Bešliagić,
10. Prijedlog rezolucije o genocidu u Srebrenici i BiH (predlagač: poslanik Muhamed Moranjkić),
11. Prijedlog rezolucije o Srebrenici (predlagač: poslanik Elmir Jahić),
12. Izvještaj Zajedničke komisije oba doma o nastojanju za postizanje sporazuma o identičnom tekstu Zakona o konkurenciji,

13. Izvještaj Zajedničke komisije oba doma o nastojanju za postizanje sporazuma o identičnom tekstu Zakona o izmjenama i dopunama Zakona o državnoj službi u institucijama Bosne i Hercegovine,
14. Informacija o stanju vanjske zaduženosti Bosne i Hercegovine u 2004. godini,
15. Prijedlog zaključka Komisije za ljudska prava, imigraciju, izbjeglice i azil o rezultatima rješavanja predstavke Udruženja decertificiranih policajaca Federacije BiH i Udruženja decertificiranih policajaca Republike Srpske,
16. Izvještaj Komisije Kolegija o nastojanju za postizanje sporazuma o zahtjevu poslanika Momčila Novakovića za razmatranje Prijedloga zakona o izmjenama i dopunama Zakona o nadzoru i kontroli prelaska državne granice po hitnom postupku, u skladu s članom 105. Poslovnika,
17. Izvještaj Komisije Kolegija o nastojanju za postizanje sporazuma o predlogu zaključaka poslanika Petra Kunića, predloženog u raspravi o informaciji predsjedavajućeg Vijeća ministara o stanju u Vijeću ministara BiH,
18. Imenovanje članova Izborne komisije BiH,
19. Imenovanje člana Administrativne komisije Predstavničkog doma (umjesto Nikole Špirića),
20. Davanje saglasnosti za ratifikaciju:
 - a) Sporazuma između Vijeća ministara BiH i Vlade Republike Hrvatske o povratku izbjeglih lica iz Bosne i Hercegovine i Republike Hrvatske,
 - b) Sporazuma između Vijeća ministara BiH i Vlade Ruske Federacije o međunarodnom drumskom saobraćaju,
 - c) Osmog amandmana na Ugovor o donaciji između Bosne i Hercegovine i Sjedinjenih Američkih Država za Program finansiranja rekonstrukcije – Program poslovnog razvoja,
 - d) Sporazuma između Vijeća ministara BiH i Vlade Ruske Federacije o osnivanju međuvladine bosanskohercegovačko-ruske komisije za trgovinsku i ekonomsku saradnju,
 - e) Sporazuma između Vijeća ministara BiH i Vlade Ruske Federacije o trgovini i ekonomskoj saradnji.

Ad – 1: Informacija predsjedavajućeg Vijeća ministara o stanju u Vijeću ministara, imajući u vidu zaključak Predstavničkog doma s prošle sjednice

Predsjedavajući Vijeća ministara Adnan Terzić podnio je Domu kratku usmenu informaciju. Rekao je, pored ostalog, kako misli da ne treba podnositi informaciju o stanju u Vijeću ministara, jer to podrazumijeva puno širu elaboraciju, već da treba informirati Dom u vezi sa zaključkom s prošle sjednice koji ga je obavezao da o načinu prevazilaženja krize razgovara sa svim strankama koje imaju poslanike u Predstavničkom domu.

Dalje je Terzić upoznao poslanike o održanim sastancima, te podsjetio na tumačenje OHR-a po kojem ministri, kojima je prihvaćena ostavka, rade u tehničkom mandatu do izbora novih ministara. Rekao je da već sutra Vijeće ministara ima sjednicu i naglasio da je u ovom momentu najvažnije da Vijeće ministara zasjeda, donosi odluke i predlaže zakonske propise.

U raspravi povodom izlaganja predsjedavajućeg Vijeća ministara učestvovali su: Tihomir Gligorić, Jelina Đurković, Zlatko Lagumdžija, Nikola Špirić, Momčilo Novaković, Jozo Križanović, Sead Avdić, Milorad Živković, Beriz Belkić, Elmir Jahić i Petar Kunić.

Nakon rasprave, predsjedavajući Džaferović predložio je zaključak – **da Dom prima k znanju informaciju koju je podnio predsjedavajući Vijeća ministara o realizaciji zaključka Doma s prošle sjednice i da Dom i dalje ostaje kod tog zaključka, te traži od predsjedavajućeg Vijeća ministara da radi na njegovoj realizaciji.**

Nije usvojen prijedlog zaključka koji je u raspravi predložio Zlatko Lagumdžija – **da Vijeće ministara najkasnije do 15. jula 2005. izađe s planom hitnih reformi za tromjesečni period i**

novim sazivom Vijeća ministara (rekonstrukcija postojećeg imenovanjem ministra vanjskih poslova, ministra komunikacija, ministra vanjske trgovine i ekonomskih odnosa ili osnivanjem novog), kako bi Parlamentarna skupština usvojila odgovarajuće odluke.

Za prijedlog ovog zaključka glasalo je devet, protiv 10, suzdržalo se pet poslanika.

Ad – 2: Zapisnik 58. sjednice Predstavničkog doma

O Zapisniku nije bilo rasprave pa je usvojen jednoglasno.

Ad – 3: Potvrđivanje imenovanja zamjenika ministra vanjskih poslova BiH

Kratko je u okviru ove tačke diskutirao Milorad Živković.

S 27 glasova za, pet protiv i pet suzdržanih (Federacija 21, RS šest), Dom je odobrio imenovanje Antona Rilla za zamjenika ministra vanjskih poslova Bosne i Hercegovine.

Ad – 4: Poslanička pitanja i odgovori

Predsjedavajući Doma konstatirao je da za ovu sjednicu nije bilo novih odgovora na poslanička pitanja.

Postavljena su nova pitanja kako slijedi:

Azra Hadžiahmetović:

1. «Dokle se došlo u raspravi o reformi policije u BiH i inicijativom da se na prvu narednu sjednicu Predstavničkog doma pozovu predstavnici stranaka parlamentarne većine i rasprave sporna pitanja u vezi s ovom reformom?

2. «Pokrećem inicijativu da se, uz poziv predstavnicima stranaka parlamentarne većine, na prvoj narednoj sjednici – HITNO – obavi rasprava o reformi policije. Uz puno uvažavanje susreta predstavnika stranaka, međunarodne zajednice i eksperata u Neumu, Doboju, «Pahuljici», «Konaku» i sl., mjesto gdje treba obaviti raspravu o ključnoj reformi – uslovu Studije izvodljivosti - je Parlament Bosne i Hercegovine».

Selim Bešlagić:

1. «U periodu juli – august ove godine planirano je čišćenje Hidroelektrane «Potpeć» na rijeci Limu, koja se nalazi u Novoj Varoši u Srbiji i Crnoj Gori. Ovdje se radi o milionima tona otpada, mulja i drugih štetnih materija, koje su godinama taložene u HE «Potpeć». Talog će rijekom Lim preći u vode BiH, ulivanjem u rijeku Drinu, što može izazvati ekološku katastrofu koja će uništiti riblji fond, ekologiju, a predstavlja i prijetnju za moguću epidemiju. Postavljam pitanja Vijeću ministara, odnosno Ministarstvu vanjskih poslova BiH:

- a) Da li postoji neki međudržavni ugovor između Bosne i Hercegovine i Srbije i Crne Gore o ovom pitanju?
- b) Da li ovaj pristup predstavlja kršenje zakona, a ako ne predstavlja, šta je onda s odštetom?
- c) Može li se ovo spriječiti?

2. Na 54. sjednici Predstavničkog doma, održanoj 12.4.2005., Vijeću ministara, kao instituciji kojoj Uprava za indirektno oporezivanje, preko Upravnog odbora, odgovara za svoj rad, postavio sam poslaničko pitanje koje je glasilo:

«Da li je moguće da Uprava za indirektno oporezivanje BiH, kao pravni sljedbenik Carinske uprave FBiH i njen direktor kao odgovorno lice u toj upravi, ne poštuje ranije Zakonom ugovorene obaveze carinske uprave FBiH, čime investicija od pet miliona KM za izgradnju najsavremenijeg carinskog terminala u BiH, pa i šire, dolazi u pitanje».

I nakon više od dva i po mjeseca od postavljanja ovog poslaničkog pitanja, do današnjeg dana nisam dobio odgovor na njega od nadležne institucije

Pošto otvoreno sumnjam da se ovdje radi o kriminalnim aktivnostima u kojima učestvuju odgovorna lica unutar Uprave za indirektno oporezivanje, koja je, nepoštujući ranije preuzete obaveze, raspisala novi tender za izgradnju carinskog terminala u Tuzli, tražim da Predstavnički dom PS osnuje privremenu komisiju koja će biti zadužena da posjeti ovaj carinski terminal, te dostavi Domu detaljne informacije o raspisivanju tendera za njegovu izgradnju, dobivanju neophodne dozvole za rad, te zaključivanju ugovora između vlasnika i korisnika terminala."

Tihomir Gligorić:

«Tražim od Vijeća ministara BiH da preispita odluku Ministarstva civilnih poslova BiH o neproduženju roka za izdavanje ličnih dokumenata građana za jedan broj općina.

Postavljam ovo pitanje jer smatram da su građani BiH oštećeni ovom odlukom kojom se izlažu novim nepotrebnim finansijskim troškovima, gubljenju vremena i nepotrebnim novim kolonama pred drugim državnim institucijama koje (građane) vlast dodatno ponižava. Zašto je donesena takva mjera za građane koji su redovno i strpljivo čekali u redovima a nisu došli na red zbog birokratske mjere aktuelne vlasti?»

Ruža Sopta:

«Pitanje postavljam Vijeću ministara i nadležnom ministarstvu.

U župu Bijelo Brdo kod Dubočca vratilo se 35 povratnika Hrvata. Svojim novcem i ličnim radom obnovili su svoje domove. Međutim, već četiri godine nemaju struje. Ljudi uglavnom žive od proizvoda koje sami proizvedu, obrađujući ono malo zemlje koja nije pod minama, i od uzgoja krava i koza – te bi im struja bila neophodna za čuvanje namirnica. Zemlju obrađuju na primitivan način jer su im mašine koje su imali opljačkane.

Pitam nadležno ministarstvo – namjerava li nešto skoro preduzeti kako bi zadržalo ove povratnike i, eventualno, ohrabario nove, u pogledu dovođenja struje u ovo mjesto, kao minimum egzistencije, kao znak dobre volje i ohrabarenja povratnika u cijeloj BiH, pogotovo tamo gdje je povratak vrlo loš?»

Ad – 5: Zahtjev Vijeća ministara za razmatranje Prijedloga zakona o izmjenama Zakona o javnim nabavkama Bosne i Hercegovine, po hitnom postupku, u skladu s članom 105. Poslovnika

U okviru ove tačke diskutirali su: Vinko Zorić, Jozo Križanović i Muhamed Moranjkić.

S 20 glasova za, šest protiv i tri suzdržana (Federacija 13, RS sedam) usvojen je zahtjev za hitni postupak.

Zakon je usvojen s 20 glasova za, četiri protiv i tri suzdržana (Federacija 13, Republika Srpska devet).

Ad – 6: Informacija o stanju sigurnosti Bosne i Hercegovine u 2004.

U raspravi su, povodom Informacije, učestvovali: Muhamed Moranjkić, Beriz Belkić, Miloš Jovanović, Selim Bešlić, Elmir Jahić, Sead Avdić, Jelina Đurković, Adem Huskić i Vinko Zorić.

U ime podnosioca Informacije govorio je ministar sigurnosti Bariša Čolak.

S 24 glasa za, osam protiv i četiri suzdržana usvojen je sljedeći

Z A K L J U Č A K

1. Prima se k znanju Informacija o stanju sigurnosti Bosne i Hercegovine, sa zaključkom nadležne komisije.

2. Zadužuje se Ministarstvo sigurnosti da Informaciju dogradi, u skladu s raspravom koja je vođena na sjednici Doma. U tu svrhu Ministarstvu će biti dostavljen transkript rasprave o Informaciji.

Ad – 7: Inicijativa Kluba poslanika SDP-a za osnivanje Odbora/Komisije za usvajanje teksta državne himne Bosne i Hercegovine

U raspravi o ovoj tački dnevnog reda učestvovali su: Selim Bešlić, Mirsad Ćeman, Momčilo Novaković, Beriz Belkić i Nikola Špirić.

Nakon rasprave, predsjedavajući je na glasanje dao Izvještaj Ustavno-pravne komisije.

Izvještaj Komisije nije usvojen. Za je glasalo 12, protiv 18, suzdržala su se četiri poslanika.

Predsjedavajući je konstatirao da se inicijativa vraća Ustavno-pravnoj komisiji na dodatno razmatranje i podnošenje novog izvještaja.

Ad – 8: Prijedlog zakona o duhanu (prvo čitanje) – predlagači: poslanici Zlatko Lagumdžija, Jozo Križanović i Selim Bešlić

Martin Raguž podsjetio je na prijedlog ministra vanjske trgovine i ekonomskih odnosa da se odgodi razmatranje ovog zakonskog prijedloga dok Vijeće ministara ne usvoji mišljenje tog ministarstva, pa je predložio da se nadležnoj komisiji da novi rok kako bi imala i stav Vijeća ministara.

U raspravi su učestvovali: Selim Bešlić, Mirsad Ćeman i Momčilo Novaković.

Predsjedavajući je konstatirao da je iz rasprave proizašao stav da se primijeni član 95. stav 3. Poslovnika, pa je Dom jednoglasno usvojio

Z A K L J U Č A K

U skladu s članom 95. stav 3. Poslovnika Doma, nadležnoj komisiji određuje se rok od 15 dana za dostavljanje novog izvještaja o Prijedlogu zakona o duhanu, uzimajući u obzir mišljenje Vijeća ministara BiH o Prijedlogu zakona i eventualno nove amandmane.

Ad – 9: Prijedlog zakona o praznicima Bosne i Hercegovine, sa Izvještajem Ustavno-pravne komisije – predlagači: poslanici Zlatko Lagumdžija, Jozo Križanović i Selim Bešlić

Predsjedavajući je podsjetio da nadležna komisija nije prihvatila principe Zakona.

U raspravi su učestvovali: Selim Bešlić, Mirsad Ćeman, Momčilo Novaković, Martin Raguž, Sead Avdić i Azra Hadžiahmetović.

Nakon rasprave, predsjedavajući je Izvještaj Ustavno-pravne komisije dao na glasanje. Za je glasalo 17, protiv 17, suzdržao se jedan poslanik.

Predsjedavajući je konstatirao da se Prijedlog zakona o praznicima vraća nadležnoj komisiji na ponovno razmatranje i daje rok od 15 dana da dostavi novi izvještaj.

Ad – 10: Prijedlog rezolucije o genocidu u Srebrenici i BiH (predlagač: poslanik Muhamed Moranjkić)

Muhamed Moranjkić rekao je da je Prijedlog rezolucije obrazložio kad je predlagao da se uvrsti u dnevni red.

Nije bilo rasprave, pa je predsjedavajući odmah proveo glasanje.

Za Prijedlog rezolucije glasalo je 20, protiv dva, suzdržala su se dva poslanika. Po entitetima, iz Federacije BiH za je glasalo 20, iz Republike Srpske nije bilo glasova za Rezoluciju.

U Kolegiju kao komisiji odmah je provedeno usaglašavanje, pri čemu nije bilo saglasnosti.

U drugom krugu glasanja iz Republike Srpske protiv je glasalo 12, što je više od 2/3 poslanika iz entiteta.

Predsjedavajući Džaferović konstatirao je da nije usvojen Prijedlog rezolucije koju je podnio Muhamed Moranjkić.

Ad – 11: Prijedlog rezolucije o Srebrenici (predlagač: poslanik Elmir Jazić)

Nikola Špirić je u raspravi, pored ostalog, rekao da je bilo vrlo malo vremena da se predložene rezolucije pogledaju, da se sravne i da se pokuša naći nešto što bi bio zajednički stav Doma. Zatim se osvrnuo na Prijedlog rezolucije Elmira Jahića i iznio konkretne prijedloge na svaki stav pojedinačno, a onda predložio da se da pauza u kojoj bi se sastali predsjedavajući klubova i pokušali doći do teksta koji bi svi prihvatili. Rekao je dalje, pored ostalog, da je o Srebrenici dosta rečeno, i zamolio da se iz teksta isključi ono što nikome neće pomoći i neće stvoriti obaveze. Naglasio je da je siguran da treba imati aktivan odnos prema ovog pitanja i apelirao na sve poslanike da se pokuša doći do prihvatljivog teksta rezolucije.

Elmir Jahić saglasio se sa stavom Špirića i izrazio nadu da će svi poslanici, ukoliko žele da se usvoji rezolucija, imati aktivan pristup i pokušati dati svoje sugestije i smjernice kako bi trebalo da izgleda tekst rezolucije.

Povodom prijedloga Špirića u raspravi su učestvovali Tihomir Gligorić, Momčilo Novaković i Petar Kunić, a onda je predsjedavajući dao pauzu i pozvao predstavnike svih klubova da komuniciraju s predlagačem Rezolucije i dostave svoje primjedbe.

Nakon pauze, Elmir Jahić obavijestio je Dom da su izvršene konsultacije s predsjednicima klubova i da su podnesne određene primjedbe i sugestije. Dalje je rekao da je i kasnije razgovarao s klubovima. I pored najbolje želje da se danas izglasa Rezolucija, njegov klub i on ne mogu prihvatiti da se ocjena **genocid** izbriše, te da on, stoga, ostaje kod Prijedloga rezolucije i predlaže da se o njoj glasa.

U daljnjoj raspravi učestvovali su: Nikola Špirić, Tihomir Gligorić, Momčilo Novaković, Muhamed Moranjkić, Šefik Džaferović, Beriz Belkić, Martin Raguž i Ljiljana Milićević.

Nakon rasprave, izvršeno je glasanje o Prijedlogu rezolucije.

Za je glasao 21, protiv 12, suzdržala su se tri poslanika. Po entitetima, iz Federacije za je glasalo 20, iz RS-a jedan poslanik.

Zbog nedostatka entitetske većine izvršeno je usaglašavanje u Kolegiju kao komisiji, gdje nije bilo saglasnosti.

U drugom krugu glasanja iz Republike Srpske protiv je glasalo 12 poslanika.

Predsjedavajući Šefik Džaferović konstatirao je da Predstavnički dom nije usvojio ni Rezoluciju čiji je predlagač Elmir Jahić.

Ad – 12 i 13:

Nije bilo rasprave o ovim tačkama dnevnog reda.

Dom je usvojio izvještaje Zajedničke komisije oba doma o usaglašavanju identičnog teksta:

- Zakona o konkurenciji (33 za, jedan suzdržan) i
- Zakona o izmjenama i dopunama Zakona o državnoj službi u institucijama Bosne i Hercegovine.

Ad – 14: Informacija o stanju vanjske zaduženosti Bosne i Hercegovine u 2004.

U raspravi povodom Informacije učestvovali su Muhamed Moranjkić i Ljerka Marić, a u ime podnosioca govorila je ministrica Ljerka Marić.

Nakon rasprave, predsjedavajući je predložio zaključak – da Dom Informaciju prima k znanju, sa Izvještajem i zaključcima Komisije za finansije i budžet.

Za ovaj zaključak glasao je 31 poslanik, a jedan je bio suzdržan.

Ad – 15: Prijedlog zaključka Komisije za ljudska prava, imigraciju, izbjeglice i azil o rezultatima rješavanja

predstavke Udruženja decertificiranih policajaca Federacije BiH i Udruženja decertificiranih policajaca Republike Srpske

Predsjedavajući Komisije za ljudska prava, imigraciju, izbjeglice i azil Elmir Jahić obrazložio je Prijedlog zaključaka.

Tihomir Gligorić i Momčilo Novaković dali su određene prijedloge za dopunu zaključaka, što je prihvatio predsjedavajući Komisije Elmir Jahić. Zatim je Dom usvojio sljedeći

Z A K L J U Č A K

1. Prihvata se materijal Komisije za ljudska prava, imigraciju, izbjeglice i azil povodom razmatranja predstavki Udruženja decertificiranih policajaca Federacije BiH i Udruženja decertificiranih policajaca Republike Srpske, sa zaključcima predloženim u materijalu.

2. Zadužuje se Vijeće ministara BiH da, u roku od 30 dana, osnuje komisiju iz tačke 2. Zaključka u materijalu Komisije te da o tome obavijesti Dom.

3. Materijal Komisije, u kojem su sadržani i zaključci koje je usvojio i Dom, kao i ovaj zaključak, bit će dostavljen Vijeću ministara BiH, OHR-u, Ustavnom sudu BiH, Sudu BiH, Tužilaštvu BiH, Ombudsmenu za ljudska prava BiH, EUPM-u i udruženjima decertificiranih policajaca, radi preduzimanja potrebnih mjera u okviru svojih nadležnosti.

Ad – 16: Izvještaj Komisije Kolegija o nastojanju za postizanje sporazuma o zahtjevu poslanika Momčila

Novakovića za razmatranje Prijedloga zakona o izmjenama i dopunama Zakona o nadzoru i kontroli

prelaska državne granice po hitnom postupku, u skladu s članom 105. Poslovnika

Predsjedavajući je konstatirao da nije postignuta saglasnost, pa je proveo glasanje u drugom krugu.

Iz Federacije BiH protiv zahtjeva glasalo je 14, što je manje od 2/3, pa je predsjedavajući konstatirao da je usvojen zahtjev Momčila Novakovića za hitni postupak, po članu 105. Poslovnika.

Zatim je predsjedavajući na glasanje dao Prijedlog zakona.

Za je glasalo 16, protiv 15 – po entitetima, iz Federacije za je glasalo pet, iz RS 11 poslanika.

Zbog nedostatka entitetske većine provedeno je usaglašavanje u Kolegiju kao komisiji, pa kako nije bilo saglasnosti, izvršeno je glasanje u drugom krugu. Tom prilikom iz Federacije BiH 15 poslanika glasalo je protiv, što je manje od 2/3 iz entiteta.

Predsjedavajući je konstatirao da je usvojen Zakon o izmjenama i dopunama Zakona o nadzoru i kontroli prelaska državne granice.

Ad – 17: Izvještaj Komisije Kolegija o nastojanju za postizanje sporazuma o prijedlogu zaključaka poslanika Petra Kunića, predloženog u raspravi o informaciji predsjedavajućeg Vijeća ministara o stanju u Vijeću ministara BiH

Ni o prijedlogu zaključka Petra Kunića nije bilo saglasnosti u Komisiji Kolegija, pa je izvršeno glasanje u drugom krugu. Iz Federacije BiH protiv zaključka glasalo je 10 poslanika, što je manje od 2/3.

Predsjedavajući je konstatirao da je usvojen zaključak koji je na 58. sjednici predložio Petar Kunić, a koji glasi:

«Poništava se odluka predsjedavajućeg Vijeća ministara BiH o imenovanju v.d. ministara».

Ad – 18: Imenovanje članova Izborne komisije BiH

Poslije uvodnih napomena predsjedavajućeg Doma Šefika Džaferovića, u raspravi su učestvovali: Nikola Špirić, Milorad Živković, Ljiljana Milićević, Momčilo Novaković, Beriz Belkić, Selim Bešlić i Muhamed Moranjić.

Nakon rasprave, za članove Izborne komisije BiH iz reda bošnjačkog i srpskog naroda izabrani su:

- Vedran Hadžović – jednoglasno, prisutan 31 poslanik u momentu glasanja i
- Tihomir Vujičić – s 23 glasa za, dva protiv i dva suzdržana.

Ad – 19: Imenovanje člana Administrativne komisije Predstavničkog doma
(umjesto Nikole Špirića)

Za člana Administrativne komisije izabran je Mladen Potočnik. Za je glasalo 29, protiv jedan, suzdržala su se dva poslanika.

Ad – 20: Davanje saglasnosti za ratifikaciju:

- a) Sporazuma između Vijeća ministara BiH i Vlade Republike Hrvatske o povratku izbjeglih lica iz Bosne i Hercegovine i Republike Hrvatske,
- b) Sporazuma između Vijeća ministara BiH i Vlade Ruske Federacije o međunarodnom drumskom saobraćaju,
- c) Osmog amandmana na Ugovor o donaciji između Bosne i Hercegovine i Sjedinjenih Američkih Država za Program finansiranja rekonstrukcije – Program poslovnog razvoja,
- d) Sporazuma između Vijeća ministara BiH i Vlade Ruske Federacije o osnivanju međuvladine bosanskohercegovačko-ruske komisije za trgovinsku i ekonomsku saradnju,
- e) Sporazuma između Vijeća ministara BiH i Vlade Ruske Federacije o trgovini i ekonomskoj saradnji.

S 32 glasa za i jednim protiv, Dom je dao saglasnost za sporazume iz ove tačke dnevnog reda.

Sjednica je završena u 19,15 sati.

Sastavni dio Zapisnika je transkript 59. sjednice Predstavničkog doma.

SEKRETAR
PREDSTAVNIČKOG DOMA
Branka Todorović

PREDSDJEDAVAJUĆI
PREDSTAVNIČKOG DOMA
Šefik Džaferović